

PRIVEE UPTREENN

PRIVEE UPTREENN

Rino Feys

Uitgeverij Ei

GEPASSEERD

T is twée jannewoarje
de fêeste is were gepasseerd

De kerstversieringe
lanst de boane gedateerd
en myne leevre gemarineerd

De frigo is leeg
en de cafes zittn vul

De nieuwjoarsbrievn liggn
in de garoage up de gazette
met t overzicht van verleen joare
en t inpakpapier
van de cadeaus die tegoare
in de koffre wacht
teegn da we noa de kringloop goan

Were n joar da nie mée up
myn doazendje kan stoan

O DENNEBOAM

Verstoa j der joe nog an?
Doaves woar je zoa snel
Geriengd an ool joen viengers
gepint mè bolln en sliengers
en doa stoen je:
Up de beste plekke van héel t uus

Héel de famielje voe joe charme voolnd
in joen verkleurnde ledluchtjes verdoolnd
Lik dat de minsn vroeger kéekn
in t vier of noa de sterrn

En ne weke loatr is t gedoan
en lig je doa, verloorn in ne noek
of in ne gat, nat van de rinne
of bevroorn, oender n loage sneeuw
géne poat nie mée voe up te stoan
binst da ool joen noaldn ofvooln

Toet da der nog ne kée één
noa t containerpark moe goan

10 JANUARI 2016

Voe elk viere, da zoe moeth genoeg zyn, zeg ze
Je wos em ton toch ool n ende ziek, zeg ze
Zy j gy nu héel uut noak van n twien
da j noais gekend é? zeg ze

Da s égluk t zelste van n beuterkoeke, zeg ze
Eiers, bloeme, beutre, melk...
en ja die suukre, zeg ze

Tegoare déeg dat in de lucht ne salto makt
en ze ziengt binst da ze bakt,
‘Ground control to major Tom...’

MOCHT HET EESN ZOVERRE KOMM

Ge moeste n poar kommisjn doen
en k wiste da j binn een n eure
were tuus gienk zyn
Moa k stelde my voarn da j weg wos
voe ooltyd en k hoopte oléne moa

da, mocht ut éesn echt zoaverre komm
da j up nen dag zoe weg zyn voe ooltyd
da k my ton eevn gemakkeluk
voarn gienk kunn stelln da j up kommisje wos
en were tuus wos binn n eure

VLIENDRE

Woa komme gy uut gekroopn, vliendre,
die probeert te vluchtn
in één van ool die dagluchtn
moa nie kan kiezn
Wuk verwacht je gy uj landt
up z ukkn geel verziep van plastiek?
Ge zet joe up n kasse van Ikea;
zoe j gy t verskil zien
tussn modern en rustiek?

Uj nie beter wist
zoe t byna skoane zyn voe zien
oe da j gy doa zoa
ooge danst up Tame Impala

Myn erte brikt u j nere strykt
up die licht vergeelde bloemn
up de kaffe van 'Ooles over cactussn
en vetplantn' van Lecturama,
bedroogn deur fotografie
van meer dan véertig joar geleen
Moa ge goa joe nie loatn doen en
lik of da j nu éest ne kée
mè jezeln wil overleggn
ploaj je joen vlerkn sierluk toe

Ja, t is februoarie,
t is koed en t rint en t goa nie sebiet
verbeetern volgens Frank
en k zoe zoa géern elpn
moa k wete nie oe

Zoa triestig da j gy noais
een bloeme in t echte
goa zien